
La Quotidiana

Dienstag, 27. Juli 2010

Ressort Engiadina

Malavita es quai l'ultim XONG

Festival cultural da trais pajais cul titel «Spiert liber»

DA BENEDICT STECHER / ANR

Dals 25 fin als 31 da lügl ha lö l'ultim festival XONG i'l triangul dals trais pajais tanter il Vnuost, la Val Müstair/Engiadina e la Drettüra Sura. L'avertüra dal XONG 2010 ha gnü lö in dumengia passada sül Chastè da Tarasp. XONG es il muond da las vals, dals umans e da la musica. Daspö il 1999 ha pisserà il XONG per inscuters ed evenimaints culturals per giasts ed indigens da las trais regiuns e sur cunfins. Cun concerts, lavuratori da musica e da teater, lavuratori per uffants e cun spassegiadas culturalas ha sport il festival i'ls ultims 12 ons cultura multifaria. La società arcus raetiae, la mamma dal XONG, ha adüna vis sia lavur sco investiziun i'l avegnir e sco cuntribuziun per ün svilup perdüraivel da las trais regiuns. Causa mancanza da finanzas ha il comitè d'organisaziun stuvü decider da schmetter cul XONG. Perquai as nomna l'ultima ediziun dal festival «SchwanenXONG».

Avertüra sül Chastè da Tarasp

L'avertüra dal festival XONG 2010 ha gnü lö sül Chastè da Tarasp illa sala da festa. Jürg Goll e Hermann Thom dal comitè d'organisaziun han preschantà il program da l'ultim XONG. Eir la Lia Rumantscha sustgnaiva il festival ed ha fat quai eir quist on. Mario Pult, collavuratur da la Lia Rumantscha, ha express la spranza cha'ls impuls da XONG güdan a realisar in Grischun üna convivenza plü activa tanter las trais regiuns linguistics. Cha'l grond merit da XONG saja d'avair savü reunir la glieud separada tras cunfins, linguas e culturas, ha'l agiunt. «Ils cunfins sun crodats grazcha a XONG eir aint ils cheus da la populaziun», ha dit Anton Mattle, rapreschantant da la regenza dal Tirol dal nord, chi saja perquai tantplü deplorabel cha'l festival nu possa plü gnir realisà in avegnir. L'avertüra dal XONG 2010 es gnüda imbellida cun plüssas producziuns musicalas.

Musica populara in möd surpudent

Il cumainzamaint ha fat la gruppa Federspiel, set giuvens students da musica da l'Austria han preschantà ün program fich varià. Musica populara da l'Austria ed eir dad oters pajais es gnüda preschantada in möd tuottafat particular e cun bler umur. Cun duos cornets, clarinetta, trumbetta, duos posaunas e bass han els inchantà l'auditori cun interpretaziuns da musica populara in möd surpudent. Ils set musicists han interpretà la musica populara in ün nouv möd: Müdamaints ritmics e passaschas chantadas han dat a lur concert blera varietà in möd cha l'auditori es gnü confruntà cun elemaints musicals insolits. La seguonda gruppa chi ha concertà d'eira il A-triO da l'Italia. Musicists da Napoli chi sun da chasa a Roma. Adonte chi's tratta eir da musica populara nun es lur musica na congualabla cun quella da lur collegas da l'Austria. Orgel da man cun büttels, clarinetta ed instrumaints da ritmica han portà i'l Chaste da Tarasp pro inglüminaziun da chandailas ün'atmosfera quieta e fina. Musica mediterrana cun passaschas bod tristas chi faiva serrar ils ögls per pudair giodair las producziuns virtuosas. Il program detaglià as chatta sülla pagina d'internet www.xong.net.